

20.10.2020

UKA2020/194

Center for Cybersikkerhed (internetikkut isumannaassuseq) pillugu inatsisip Kunngip peqqussutaatigut Kalaallit Nunaannut atuutsinneqalernissaanut Inatsisartut aalajangiussas-saatut siunnersuutaa Kalaallit Nunaanni Namminersorlutik Oqartussanit akuerineqassasoq.
(Ilinniartitaanermut, Kultureqarnermut Ilageeqarnermullu Naalakkersuisoq)

Siumumiit Naalakkersuisut internettikkut allatigullu isumannaassuseq pillugu Kunngip peqqus-sutaatigut naalagaaffiup inatsisaanut akuulernissatsinnut aalajangiiffigisassatut siunnersuutaannut qujavugut, imalu oqaaseqassaagut.

Ukiuni kingullerni internettikkut attaveqatigiinneq niueqatigiinneq aammalu pingaartumik paasisutissanik avitseqatigiittarnerit sukkasuumik ineriartupiloorput atorneqaleraluttuinnarlutillu. Inuunitsinnut atortorissaarutit taamaattut oqilisaataangaatsiarmata tupinnanngitsumik tamatsinnit ilassilluarneqarlutik atorluarneqaqaat. Ilami inuunitsinnut akuulluinnalernikuupput, meerartagut tablettimik pinnguartut utoqqartagut facebookkertut uagut bankitsinni kontogut marserujoorsin-naasarpagut, fjernsynimi netflix ikillugu.

Taama ilorrisimaaluta internet atuleraangatsigu eqqarsaatigivallaartarunanngilarpud internet aamma peqquserlunnikkut atorneqangaatsiarmat, inuttullut paasissutissaatigut imaaliillaannaq ilisimangisatsinnik allanut avitseqatigiissutigisinnaasariatsigit.

Taamaattumik maanna oqallisigisarpud pingaartorujussuuvoq, ajoraluartumilli inuiaqatigiinni eqqartorneqanngingajappoq. Taamaattumik maani inatsisartuni Naalakkersuisut aalajangiiffigisas-sanngortitaat kunngip peqqussutaa aqqutsigalugu nunatsinnut atuuttussanngortinneqartussaq Siumumiit ilalerparput.

Inuttut ataasiakkaatut illersugaanerput nunanit allanit kalluarneqannginnissaa qulakkeersimajuar-tariaqarparput. Taamatutaaq nunatta paasissutissaatai illersoqqissaagassat qularnaatsumik toqqoqqaneqartariaqarput, nunanit allanit tillinniarfigineqarsinnaajunnaarsillugit.

Atortorissaarutit maanna atukkagut nunanit allanit iserfigineqaratarsinnaanerat mianeriniarlugu suleqatigiinnik nunanik ilaaffeqarnissarpud pingaarpoq. Tassami teknikkikkut ineriartorneq taama sukkatigisoq nunatut kisermaallugu ingerlanniassagaluarutsigu malinnaaniarneq oqimaattorujus-suusaaq.

Taama oqaaseqarluta Siumumiit siunnersuut ilaleratsigu oqaatigissavara, taamallu isikkoqartillugu aappasaaneerneqarnissaa inassutigarpud.

Doris J. Jensen
Siumut

